

二十年而足跡未嘗及閩外云生一子曰安漂封鎮  
國將軍雅文樂善邦人賢之夫人旦夕常訓漂曰汝  
爲宗室享國厚恩宜崇儉守憲以承天休無效末  
俗奢縱爲也漂恪服終身而動不違諸禮者夫人之  
教也嘉靖癸巳夏六月二十八日夫人卒距其生成  
化丁亥冬十一月二十三日得年六十有七卒之日  
漂列母之懿德匍匐號泣以告于藩王藩王達之  
天子乃追封宮人魏氏爲夫人且賜祭一壇蓋殊典  
也夫人生一女封韓城縣主配儀賓潘希龍漂配夫  
人王氏生子一曰睦榘女二俱幼未受名封明年甲

午夏四月十三日葬于滎陽縣宿水河之原欽築  
王塋之次余汴人也頗聞夫人之賢故於其請銘也  
直據其狀而書之不復辭銘曰

傳有三姬稟淑質兮自牖納忠咸可述兮於維夫人  
其疇匹兮相王教子志專一兮千秋令名如皎日  
兮滎陽之原水滴滴兮泉深土堅維爾之玄室兮窈  
兮沕兮從王其永畢兮

明誥封夫人王氏墓誌銘

夫人姓王氏祥符儒家女也祖宇績官至大理寺卿  
有聲於正統景泰天順間父崇晦德不仕母趙氏夫